



Sil e spel lag da Saon el Delta dil Danubi fascineschan fauna e flora e cun in tec cletg ves'ins era pelicans, iruns grischs e massa auters utschals.

FOTOS S. ROTHMUND

Vacanzas da mai emblidar (part 2)

Il flum il secund liung dall'Europa ed il punct culminont el Delta dil Danubi

DA SUSI ROTHMUND / ANR

■ Igl ei stau in'aventura tut apartia da far vacanzas sin ina cruschera che ha menau nus naven da Passau dil Danubi (Donau) giu tochen alla Mar Nera. Leu, el Delta dil Danubi, ch'ei in reservat da biosfera ed in paradys da fauna e flora, ei l'emprema part dil viadi stada a fin ed il viadi anavos ha entschiet.

Era quel ei staus indimenticabels e cun nus eran sil bastiment, fussen il pli bugen stai traso silla punt per contemplar las cuntradas zun variontas. Il Danubi cuora numnadamein tras diesch tiaras ed ei dat massa da veser. Marcaus moderns ed illuminau sco Linz ni Budapest cun in'architectura imposanta e puncts da differents stils e temps. Suenter vellas e hotels ves'ins denton adina puspei era loghens pli paupers cun baraccas e taunas ed era las schlusas pintgas e pli aultas han attratg l'attenziun – oravontut dils umens. En Rumenia ed Ungaria ein entiras cuntradas surtratgas cun fluras sulegl ed èras da garnezi – ina monocultura en tiaras zun fritgeivlas. Ei fa biala pareta mo dat da patertgar.

Ilsguids da viadi els loghens visitai han mintgamai mussau ils marcaus ed autras attracziuns turisticas ed era tradiu in tschuat dalla veta e cultura dils pievels che vivan ella vischinonza dil Danubi.

Bucarest, il bi marcau «nunenconuschent»

Cheu entginas staziuns: Sin viadi a Bucarest, la capitala dalla Rumenia, ei la mischeida da svilup economic e paupradad en l'agglomeraziun curdada en egl. Il marcau cun ver 2,5 milliuns habitonts ei signaus entras la prosperitad economica el 19avel tschentaner e quella ha dau a Bucarest in caracter generus. Biars parcs cun orts da rosas sluccan il maletg dil marcau e baghetgs representativs sco per exempel igl artg da triumf regordan als curdai d'uront l'emprema uiera mundiala. L'aulta cultura cosmopolitica e l'influenza franzosa dominonta en l'architectura dil marcau han purtau ad el il secund num «Micul Paris» (Pign Paris ni era Paris digl Ost). In gust amar lai la viseta tier la casa dil dictatur Ceausescu anavos. Per construir «siu» palast dalla giusta ei numnadamein vegniu investau rodund tschun milliardas Euros e dasperas haveva il pievel nuot da magliar. Bucarest ei in marcau el svilup e sco nosa guida ha tradiu ei il pievel optimistic: «Nus havein speranza e pazienza e stuein luvrar fetg per in meglier futur.» Ei seigi denton tut auter che sempel per tgei luvrers sco polizists ni scolasts gudognien denter 400 – 800 Euros e biars hagian aunc in secund job.

Serbia ed Ungaria

Novi Sad ei in bellezza marcau baroc en Serbia e la capitala dalla provinza Vojvodina. El ei in'impurtonta cruschada da viafier e zun frequentau port dil flum. Il giuven e losch marcau schai amiez extendi èrs da garnezi e vegn bugnaus dil Danubi. La fortezia Petrovaradin vala sco monument historic da Novi Sad. In oreifer bi di ei quel dall'excursiun silla tiara en l'Ungaria staus.

Leu ei la tratga dil paprica l'existenza per dabiars ed era las lavurs d'artisanadi han gronda tradiziun. Ella Pusza han la show culs cavals e cavalcaders mo era cullas vacas grischas dall'Ungaria e la tura cun carotscha e cavagl ella steppa plaschiu als turists. Tuttina ei enqualin sedumandaus tgei ch'ei han tut fatg culs cavals ch'ei fan aschia per camond, sesan per exempel sco tgauns, schaian giun plaun e laian buca tementar dil cuntinuau sluppetem dallas gheislas. Las dunnas dils nursers han surviu ina tratga tradiziunala cun bia tiasta ed era il vinar ha gustau.

Bratislava

Visitond l'emprema ga Bratislava, la capitala dalla Slovacchia, havein giu endamen da turnar puspei ina ga per restar enzacons dis e guder las streglias e gassas dil marcau vegl che regorda empau als marcaus dall'Italia. Numerusas sculpturas embelleschan il marcau ed in paus en in dils cafés silla piazza lai emblidar il temps. Ad Eurovea, il quartier modern da Bratislava, eis ei ideal per far shopping, mo era il grond parc cun promenada sper il Danubi carmala neutier indigens e hosps. Tras la biala cuntrada dalla Wachau cuntinuescha il viadi encunter casa. La Wachau s'auda tiel patrimoni cultural mundial dall'Unesco ed ei ina cuntrada da vegnas enconuscha – in curtgin dils senns che ha gia adina inspirau ils artists. Secapescha ei ina viseta ella claustra da Melk stada sil program. La sera tard ei la cruschera ida tras Linz ed il marcau illuminau ha aunc ina ga purschiu bials muments silla punt dall'Amadeus Elegant.

Ulteriuras informaziuns davart ils viadis sil Danubi ni era sil Rein e Mosel ni auters flums: www.rivage-flussreisen.ch



Il dictatur Ceausescu ha schau pitir dalla fom il pievel Rumen ferton ch'el ha investau milliardas per construir quei baghetg stravagau a Bucarest.



Cheu ina pli biala vart da Bucarest, baghetgs cun historia ch'il dictatur Ceausescu ei buca vegnius da schar destruir.



Novi Sad en Serbia ei in giuven e losch marcau sper il Danubi.



Bratislava – in marcau fascinont cun bialscherm e veta pulsonta.



La managera da viadi da Rivage Flussreisen, Simone Weidensee cun l'onda Manzi.



In sault tradiziunal dall'Ungaria – strusch da crer che la donna sa saltar cun quels calzers.



La show culs cavals e cavalcaders ella Pusza ha fatg smarvegliar ils hosps da Rivage Flussreisen.